



**GAZETI RASMI LA SERIKALI YA  
MAPINDUZI YA ZANZIBAR**  
(Hupigwa Chapa kwa Amri ya Serikali)

Sehemu ya CXXVII Nam. 6733

5 Novemba, 2018

Bei Shs. 3,000/=

Imekubaliwa na Mkuu wa Posta kuwa ni Gazeti

**YALIYOMO**

*Ukurasa*

Mswada wa Sheria ya Kuanzisha Wakala wa Serikali  
wa Huduma za Matrekta na Zana za Kilimo, 2018  
na mambo mengine yanayohusiana na hayo ..... 272

**SEHEMU YA SHERIA**

Tangazo la Mswada lililotajwa hapo chini linatangazwa katika *Gazeti Rasmi* hili.

**Tangazo la Mswada**

Nam. : Mswada huu utajulikana kama Sheria ya Wakala wa Serikali  
wa Huduma za Matrekta na Zana za Kilimo, 2018

**TANGAZO**

Mswada ufuatao utawasilishwa katika Mkutano wa Baraza la Wawakilishi utakaoanza tarehe 28 Novemba, 2018 kwa kusomwa kwa mara ya kwanza na unachapishwa pamoja na Madhumuni na Sababu zake kwa ajili ya kutoa taarifa kwa wananchi.

**ZANZIBAR**  
5 Novemba, 2018

(Dkt. ABDULHAMID Y. MZEE)  
*Katibu wa Baraza la Mapinduzi na  
Katibu Mkuu Kiongozi.*

Matangazo yaliyohusu maiti, kuvunjika kwa Ushirika na baadhi ya matangazo ambayo ni muhimu kwa watu kujua yanaweza kutiwa katika Gazeti. Nakala matangazo namna hiyo, zipelekwe kwa Mhariri wa Gazeti Rasmi la Serikali ya Mapinduzi ya Zanzibar - Tanzania katika nyumba ya kupiga Chapa, Sanduku la Posta 261. Nakala zisichelewe kuliko Jumatatu kila wiki.

**MSWADA  
WA  
SHERIA YA KUENZISHA WAKALA WA SERIKALI WA  
HUDUMA ZA MATREKTA NA ZANA ZA KILIMO NA  
MAMBO MENGINE YANAYOHUSIANA NA HAYO**

---

**IMETUNGWA** na Baraza la Wawakilishi la Zanzibar.

**SEHEMU YA KWANZA  
MASHARTI YA AWALI**

Jina fupi  
na kuanza  
kutumika.

**1.** Sheria hii itajulikana kama Sheria ya Wakala wa Serikali wa Huduma za Matrekta na Zana za Kilimo, 2018 na itanza kutumika mara tu baada ya kutiwa saina na Rais.

Ufafanuzi.

**2.** Katika Sheria hii, isipokuwa kama itaelezwa vyenginevyo:

“Wakala” maana yake ni Wakala wa Serikali wa Huduma za Matrekta na Zana za Kilimo ulioanziswa chini ya kifungu cha 3 cha Sheria hii;

“Kilimo” maana yake ni mazao yanayolimwa ardhini, misitu na rasilimali zinazotokana na mazingira yoyote ya uoteshaji;

“Bodi” maana yake ni Bodi ya Wakurugenzi ya Wakala iliyoanzishwa chini ya kifungu 7 (1) cha Sheria hii;

“Mkurugenzi Mtendaji” maana yake ni mtu aliyeteuliwa chini ya kifungu cha 21 (1) cha Sheria hii;

“Waziri” maana yake ni Waziri anehusika na masuala ya matrekta na zana za kilimo;

“Wizara” maana yake ni Wizara inayohusika na masuala ya matrekta na zana za kilimo;

“Rais” maana yake ni Rasi wa Zanzibar na Mwenyekiti wa Baraza la Mapinduzi;

“Kitengo” maana yake ni kitengo cha Karakana ya matengenezo ya matrekta.

**SEHEMU YA PILI  
UANZISHWAJI WA WAKALA**

Kuanzishwa  
kwa Wakala.

**3.** Kunaanzishwa Wakala wa Serikali wa Huduma za Matrekta na Zana za Kilimo.

4.-(1) Wakala utakuwa ni mamlaka isiyojitegemea, kwa muundo na hadhi yake utakuwa na uwezo ufuatao: Uwezo na malengo ya Wakala.

- (a) kupata, kumiliki, kununua au kuhamisha mali yoyote inayohamishika na isiyohamishika;
- (b) kuingia kwenye mkataba wowote, ubia au muamala kwa mujibu wa Sheria;
- (c) kukopa fedha kutoka katika taasisi yoyote ya kifedha kwa mujibu wa masharti ya Sheria ya Usimamizi wa Fedha za Umma; na
- (d) kutekeleza au kufanya jambo lolote au kitu chochote ambacho Wakala wa aina yake unaweza kutekeleza kwa mujibu wa Sheria.

(2) Wakala utakuwa na malengo ya:

- (a) kuwa na Karakana zilizosheheni vifaa vyenye uwezo wa kutosha katika kukabiliana na soko la zana kilimo;
- (b) kuongeza uzalishaji wa kilimo chenye tija, faida na kipato kinachotokana na ongezeko la uwekezaji katika utumiaji wa zana za kilimo kupitia ushirikishwaji mkubwa wa sekta binafsi na kuimarisha utoaji wa huduma bora za matrekta na zana za kilimo;
- (c) kuongeza ufanisi katika kutoa huduma bora za matrekta na zana za kilimo kwa wakulima, kupunguza ugumu katika kazi za kilimo na kufanya kazi za kilimo mashambani kuwa zenye kuvutia; na
- (d) kuendeleza Programu zenye ufanisi katika uongozi na utawala.

5.-(1) Kutakuwa na muhuri wa Wakala katika muundo na aina kama itakavyoamuliwa na Bodi. Muhuri wa Wakala.

(2) Nyaraka yoyote itakayotolewa na Wakala itawekwa muhuri wa Wakala na itathibitishwa kwa sahihi ya Mkurugenzi Mtendaji au Ofisa mwengine wa Wakala aliyeidhinishwa na Mkurugenzi Mtendaji.

(3) Kutakuwa na kifupisho cha Wakala kama itakavyoamuliwa na Bodi.

6. Kwa kuzingatia masharti ya Sheria hii, Wakala utakuwa na kazi za: Kazi za Wakala.

- (a) kuendeleza na kukuza huduma za ukodishaji wa matrekta kwa wakulima, sekta binafsi na taasisi mbali mbali katika matumizi bora ya matrekta pamoja na zana nyengine katika kilimo;
- (b) kuendesha biashara ya ununuzi wa matrekta, kuunganisha matrekta na zana zake husika, kusafirisha na kuingiza matrekta na zana za kilimo zilizokwishaunganishwa na kuwa kama wazalishaji, wakala wa mauzo wa zana za kilimo na vifaa vyenginevyo kama vinavyohitajika na wateja;
- (c) kuendeleza utoaji wa huduma za matengenezo makubwa na ya kawaida ya Matrekta, zana zake pamoja na zana nyengine za kilimo;
- (d) kuendeleza utafiti unaohusiana na matumizi ya zana za kilimo kwa lengo la kuongeza ufahamu kwa wakulima na uelewa wa kujua aina na uwezo wa matrekta na zana za kilimo zitakazohitajika kulingana na aina mbali mbali za udongo;
- (e) kutoa mafunzo kwa wahandisi, mafundi na watumiaji wa matrekta, wasimamizi wa zana za kilimo, madereva wa matrekta, waendeshaji wa zana nyengine za kilimo katika kuwawezesha kujifunza na kupata uzoefu utakaowafaa katika kuhudumia matrekta na zana za kilimo; na
- (f) kufanya kazi nyengine yoyote chini ya Sheria hii au itakayokuwa na umuhimu katika kufikia malengo ya Wakala.

**SEHEMU YA TATU  
UONGOZI WA WAKALA**

Kuanzishwa  
kwa  
Bodi ya  
Wakurugenzi.

7.-(1) Kunaanzishwa Bodi ya Wakurugenzi ya Wakala ambayo itaundwa na wajumbe wafuatao:

- (a) Mwenyekiti ambaye atateuliwa na Rais;
- (b) Mkurugenzi Mtendaji;
- (c) Mkurugenzi anayehusika na Kilimo;
- (d) Mkurugenzi wa Karakana kuu ya Serikali;
- (e) Wajumbe watatu watakaoteuliwa na Waziri.

(2) Ukitoa wajumbe wanaoingia kwa nafasi zao, wajumbe wengine watateuliwa na Waziri kwa kushauriana na taasisi husika kwa kuzingatia jinsia na taaluma.

(3) Bodi itamteua mmoja miongoni mwa wajumbe kuwa Makamu Mwenyekiti wa Bodi.

(4) Mwenyekiti wa Bodi atatumikia nafasi kwa kipindi cha miaka minne kutoka tarehe ya uteuzi wake na anaweza kuwa na sifa ya kuteuliwa tena.

(5) Ukitoa wajumbe wanaoingia kwa nafasi zao, wajumbe wengine wa Bodi watatumikia nafasi kwa miaka mitatu na wanaweza kuwa na sifa ya kuteuliwa tena.

(6) Bodi itamteua mwanasheria mwenye sifa ndani ya Wizara au Wakala kuwa Katibu wa Bodi.

(7) Kwa kuzingatia masharti ya kifungu kidogo (6) cha kifungu hiki, Katibu atawajibika kwa Bodi, na atawajibika kuhakikisha kuwa:

- (a) kumbukumbu sahihi za vikao vya Bodi zinachukuliwa kwa umakini;
- (b) kumbukumbu sahihi na zinazojitosheleza za Bodi zinahifadhiwa kwa umakini;
- (c) taarifa sahihi za vikao vya Bodi zinatolewa kwa wajumbe;
- (d) kutoa ushauri sahihi kwa Bodi wakati inapohitajika, na mambo mengine kama Bodi itakavyoagiza.

8. Mtu atakuwa na sifa ya kuteuliwa kuwa Mwenyekiti iwapo mtu huyo: Sifa za Mwenyekiti.

- (a) ni Mzanzibari;
- (b) ana angalau shahada ya kwanza katika fani ya Uhandisi wa Kilimo, Uhandisi wa Zana za Kilimo au fani nyengine zinazohusiana na fani hizo kutoka Chuo Kikuu kinachotambulika;
- (c) ana uzoefu wa angalau miaka kumi (10) katika fani ya Uhandisi wa Kilimo au fani zinazohusiana na hizo;
- (d) ana heshima ya kiwango cha juu katika utumishi wa umma; na
- (e) ana uwezo wa kiwango cha juu wa kusimamia kwa ufanisi na ubora masuala ya Wakala.

Kazi za Bodi.

- 9.** Bodi itakuwa na kazi za:
- (a) kusimamia uongozi wa Wakala katika kutekeleza majukumu yake ya utoaji wa huduma za matrekta na zana za kilimo;
  - (b) kupitia na kuridhia sera, mipango ya kibiashara na uendeshaji, ukaguzi na ripoti za kifedha, na taarifa za Wakala kulingana na malengo ya Wakala yaliyomo chini ya Sheria hii;
  - (c) kuweka miongozo juu ya utekelezaji wa mpango mkakati wa Wakala na kuidhinisha bajeti ya kila mwaka;
  - (d) kushauri juu ya uanzishaji wa idara au vitengo au divisheni za Wakala pale itakapohitajika kulingana na taratibu za Kamisheni ya Utumishi wa Umma;
  - (e) kumshauri Waziri njia bora ya kuendeleza Wakala;
  - (f) kuweka miongozo sahihi ya kisera, mipango ya kibiashara na kiuendeshaji pamoja na utekelezaji wa bajeti;
  - (g) kusaidia utayarishaji wa malengo yaliyopendekezwa, viashiria vya utekelezaji wa majukumu ya Wakala kama ilivyokubaliwa kulingana na:
    - (i) mpango mkakati wa Wakala; na
    - (ii) mpango kazi wa mwaka wa Wakala.
  - (h) kufanya kazi nyengine yoyote ambayo imeainishwa katika Sheria hii ambayo inaweza kuwa ni muhimu katika kufikia malengo ya kuanzishwa kwa Wakala.

Kamati za Bodi.

**10.** Bodi inaweza, kwa makubaliano na masharti kama itakavyoamua, kuanzisha Kamati, kama itakavyoona kuna umuhimu wa kufanya kazi.

Kukasimu kazi za Bodi.

**11.** Bodi inaweza, ikiona inafaa kwa utekelezaji bora wa kazi zake, kukasimu baadhi ya kazi zake kwa Kamati au Katibu wa Bodi.

Vikao vya Bodi.

**12.**-(1) Bodi itafanya vikao vyake vya kawaida angalau mara moja katika kila kipindi cha mienzi mitatu na inaweza kukutana ikiwa ipo haja ya kufanya hivyo kwa kutekeleza kazi zake katika maeneo kama Bodi itakavyoamua kila baada ya muda.

(2) Kikao cha Bodi kitaitishwa na na kuendeshwa na Mwenyekiti, ikiwa hayupo Mwenyekiti, Makamu Mwenyekiti ataendesha kikao na ikiwa wote wawili Mwenyekiti na Makamu Mwenyekiti hawapo,

wajumbe waliyopo katika kikao watamteua mmoja miongoni mwa wajumbe kuendesha kikao.

**13.** Akidi ya kikao cha Bodi itakuwa ni zaidi ya nusu ya Wajumbe wa Bodi kwa kila kikao.

Akidi ya  
Kikao cha  
Bodi.

**14.**-(1) Maamuzi ya Bodi yatafanywa kwa makubaliano na ikiwa makubaliano hayatofikiwa, maamuzi yatafanyika kwa kupiga kura na endapo kura zitakuwa sawa, Mwenyekiti au Makamu Mwenyekiti au mjumbe anayeendesha kikao atakuwa na kura ya maamuzi.

Maamuzi ya  
Bodi.

(2) Bila ya kujali masharti ya kifungu kidogo cha (1) cha kifungu hiki, maamuzi yanaweza kufanywa na Bodi kwa kupitisha karatasi kwa wajumbe ambapo kila mjumbe ataelezea maoni yake kwa maandishi isipokuwa kwamba mjumbe yeyote anaweza kuhitaji kuwa uamuzi wowote unaweza kupingwa kwa kujadiliwa katika kikao kamili cha Bodi.

(3) Maazimio ya maandishi yanayotokana kwa kupitisha karatasi kwa wajumbe na kusainiwa Zanzibar ambapo wajumbe hao hawatapungua watano, yatachukuliwa kama ni maamuzi yaliyofanywa katika kikao isipokuwa kwamba mjumbe anaweza kuhitaji, bila ya kujali saina za wajumbe, jambo hilo lipelekwe katika kikao cha Bodi kinachofuata.

**15.** Kumbukumbu za uendeshaji wa vikao vyote vya Bodi zitahibitishwa katika kikao kinachofuata cha Bodi na kuwekwa saina na Mwenyekiti wa kikao na Katibu wa Bodi.

Kumbu-  
kumbu za  
vikao vya  
Bodi.

**16.** Kwa kuzingatia masharti ya Sheria hii, Bodi itakuwa na uwezo wa kuweka taratibu zake zinazohusiana na vikao na uendeshaji bora wa kazi zake ikijumuisha Kamati za Bodi.

Taratibu  
za vikao.

**17.** Mwenyekiti au mjumbe yeyote wa Bodi anaweza, wakati wowote kujiuzulu kwa kutoa taarifa ya maandishi ya mwezi mmoja kwa mamlaka ya uteuzi na kutoka tarehe iliyoainishwa katika taarifa au, ikiwa tarehe haijaainishwa kutoka tarehe iliyopokelewa taarifa hiyo na mamlaka ya uteuzi, atasita kuwa mjumbe.

Kujiuzulu  
kwa  
mjumbe.

**18.** Waziri anaweza kumuondosha au kumsitisha mjumbe yeyote wa Bodi asiyekuwa Mwenyekiti na Mjumbe anayeingia kwa nafasi yake ikiwa mjumbe huyo:

Kuondosha  
au  
kusitishwa  
kwa  
mjumbe.

- (a) hana uwezo wa kutekeleza kazi katika nafasi yake kwa sababu za kiafya za kimwili au kiakili;
- (b) ametiwa hatiani kwa kosa la jinai linalohusiana na udanganyifu, kutokuwa mwadilifu au kinyume na maadili;

- (c) ameziuzulu;
- (d) amefariki;
- (e) ameshindwa kuhudhuria katika vikao vitatu mfululizo vya Bodi bila ya kuwa na ruhusa ya Mwenyekiti; au
- (f) kwa sababu nyengine yoyote ya msingi itakayotolewa kwa maandishi.

Posho za wajumbe.

**19.** Wajumbe wa Bodi watapewa posho kama Waziri atakavyoamua kila baada ya muda kwa mujibu wa Sheria ya Utumishi wa Umma, Kanuni na Miongozo.

Mjumbe mualikwa.

**20.** Bodi inaweza kumualika mtu yeyote asiyekuwa mjumbe kuhudhuria katika kikao chochote cha Bodi kama mtaalamu lakini mtu huyo aliyealikwa hatokuwa na haki ya kupiga kura.

**SEHEMU YA NNE**  
**MKURUGENZI MTENDAJI NA WAFANYAKAZI**  
**WENGINE WA WAKALA**

Uteuzi wa Mkurugenzi Mtendaji.

**21.**-(1) Kutakuwa na Mkurugenzi Mtendaji atakayeteuliwa na Rais.

(2) Mkurugenzi Mtendaji atakuwa ni Ofisa Mtendaji Mkuu wa Wakala na atawajibika kwa kazi za kila siku za Wakala.

Sifa za Mkurugenzi Mtendaji.

**22.** Mtu atakuwa na sifa ya kuteuliwa kuwa Mkurugenzi Mtendaji iwapo:

- (a) ni Mzanzibari;
- (b) ana angalau shahada ya kwanza kutoka katika chuo kikuu kinachotambulika katika fani ya Uhandisi wa Kilimo, Uhandisi wa Zana za Kilimo au fani nyengine zinazohusiana na fani hizo;
- (c) ana uzoefu wa angalau miaka saba katika fani ya Uhandisi wa Kilimo au fani zinazohusiana na hizo; na
- (d) ana heshima ya kiwango cha juu katika utumishi wa umma.

Majukumu ya Mkurugenzi Mtendaji.

**23.** Mkurugenzi Mtendaji atakuwa majukumu ya:

- (a) kuwajibika kwa shughuli za kila siku;
- (b) kuwajibika kwa mapato yote na matumizi ya Wakala;



- (c) kusimamia mambo ya Wakala kwa ufanisi na gharama stahiki;
- (d) kusimamia huduma za matrekta na zana nyengine za kilimo na makubaliano mengine ya kimataifa yanayohusiana na masuala ya zana za kilimo;
- (e) kusimamia mapato yote, matumizi na makusanyo ya Wakala kwa mujibu wa Sheria husika;
- (f) kuangalia na kuimarisha ufanisi wa kazi zote za Wakala:
  - (i) usimamizi wa kazi za kila siku za Wakala; na
  - (ii) usimamizi wa fedha, mali na kazi za Wakala.
- (g) kuwasilisha taarifa za kazi za Wakala kwa Bodi; na
- (h) kutekeleza majumu mengine yoyote kama itakavyolazimika au kuhitajika kwa utekelezaji mzuri wa kazi chini ya Sheria hii.

**24.**-(1) Wakala unaweza, kwa makubaliano na masharti, kuajiri wafanyakazi wengine, au kuajiri huduma za ushauri elekezi au utaalumu, kama itakavyohitajika kwa utekelezaji mzuri wa kazi za Wakala.

Wafanyakazi  
wa Wakala.

(2) Uajiri wa wafanyakazi chini ya kifungu kidogo cha (1) cha kifungu hiki utafanywa kwa mujibu wa Sheria ya Utumishi wa Umma.

(3) Wafanyakazi waliopo katika kitengo wataendelea kufanya kazi na watachukuliwa ni wafanyakazi wa Wakala walioajiriwa chini ya masharti ya Sheria hii.

**25.**-(1) Kutakuwa na ndani ya Wakala, Idara, Kitengo na Divisheni kama itakavyohitajika kwa utekelezaji mzuri wa kazi zake kama itakavyoamuliwa na Bodi na kuidhinishwa na Kamisheni ya Utumishi wa Umma.

Kurugenzi  
za Wakala.

(2) Mkuu wa Idara atateuliwa na Bodi, na atakuwa mtu mwenye elimu na uzoefu wa kutosha kutekeleza kazi za Idara husika.

(3) Mkuu wa Idara, Kitengo na Divisheni atatekeleza kazi zake chini ya usimamizi wa Mkurugenzi Mtendaji.

**26.** Katika kutekeleza kazi zake, Waziri atakuwa na uwezo wa kusimamia utekelezaji wa Sera zinazohusiana na Wakala na kutoa maelekezo ya jumla na amri kwa Wakala na Bodi kama atakavyoona inafaa.

Uwezo wa  
Waziri na  
uhusiano  
wake na  
Wakala.

Uhusiano  
baina ya  
Wakala na  
Wizara.

**27.** Kwa kuzingatia masharti ya Sheria hii, Wakala utakuwa na wajibu wa kuwasilisha taarifa yoyote ya utawala na utendaji kwa Wizara kama itakavyohitajika.

### **SEHEMU YA TANO MASHARTI YA FEDHA**

Fedha za  
Wakala.

**28.**-(1) Fedha na rasilimali za Wakala zitajumuisha:

- (a) fedha zilizotengwa na Baraza la Wawakilishi kwa ajili ya matumizi ya Wakala;
- (b) fedha zilizopokelewa na Wakala kutokana na bidhaa au huduma zilizotolewa na Wakala;
- (c) misaada halali, zawadi, michango, mikopo, urithi, au uwekezaji ambazo zinaweza kupokelewa kutoka kwa mtu yeyote au jumuiya;
- (d) fedha nyengine zozote itakazopewa au kupatikana kihalali na Wakala.

(2) Wakala utatekeleza kazi zake kwa mujibu wa misingi ya kifedha inayotambulika na utahakikisha kwamba, kadri iwezekanavyo, makusanyo yake yanatosheleza kukidhi matumizi sahihi kwa mujibu wa mpango mkakati.

(3) Stakabadhi zote, mapato na makusanyo ya mfuko maalum yatakuwa ni mali ya Wakala na kwa kuzingatia uwezo wa Wakala wa kuongeza mapato kutoka katika utendaji kazi wake na uwezo wake wa kujitegemea kifedha, athari ya kifedha ya mpango wake mkakati na mpango wa mwaka wa kazi na bajeti.

(4) Waziri mwenye dhamana anaweza baada ya kushauriana na Waziri wa Fedha, kuamua kiwango cha makusanyo ambacho kitabakia kuwa mali ya Wakala na kiwango cha makusanyo ambacho kitachukuliwa kuwa ni fedha za umma na kuwekwa katika hesabu ya Serikali.

(5) Miamala yote ya fedha ya Wakala itafanywa na kusimamiwa kwa mujibu wa Sheria ya Usimamizi wa Fedha za Umma na Sheria nyengine ya Fedha.

Makadirio  
ya mapato  
na  
matumizi.

**29.**-(1) Mkurugenzi Mtendaji wa Wakala atatayarisha au kusababisha kutayarishwa, si chini ya miezi mitatu kabla ya mwisho wa mwaka wa fedha, makadirio ya mapato na matumizi kwa mwaka unaofuata na anaweza, wakati wowote kabla ya mwisho wa mwaka.

(2) Makadirio ya mapato na matumizi kwa mwaka wa fedha wa Wakala yatawasilishwa kwa Bodi kwa mazingatio na baada ya hapo, kuwasilishwa kwa Waziri anayehusika kwa ajili ya kuidhinishwa.

(3) Kwa madhumuni ya kifungu hiki makadirio ya mapato na matumizi yatajumuisha makadirio ya ziada.

(4) Makadirio ya mapato na matumizi ya Wakala yatatayarishwa kwa mujibu wa matakwa na masharti ya Sheria ya Usimamizi wa Fedha na maagizo mengine kama yatakavyoweza kutolewa na Serikali kila baada ya muda.

(5) Mkurugenzi Mtendaji atahakikisha kwamba malipo yote ya fedha za Wakala yanalipwa kwa usahihi na yanaidhinishwa ipasavyo na udhibiti unaopaswa unazingatiwa kwa mali zake na madeni ya Wakala

**30.**-(1) Mkurugenzi Mtendaji wa Wakala atahakikisha kwamba vitabu vya hesabu na kumbukumbu nyengine za fedha katika utekelezaji wa kazi za Wakala zinahifadhiwa ipasavyo kwa mujibu wa utaratibu wa fedha za umma na uhasibu. Hesabu na ukaguzi.

(2) Hesabu za Wakala zitakaguliwa na Mdhibiti na Mkaguzi Mkuu wa Hesabu za Serikali au mkaguzi mwingine aliyesajiliwa na kuidhinishwa kwa madhumuni hayo na Mdhibiti na Mkaguzi Mkuu wa Hesabu za Serikali kama atakavyoamua.

**31.**-(1) Mkurugenzi Mtendaji wa Wakala, ndani ya kipindi cha miezi miwili baada ya mwisho wa kila mwaka wa fedha, atatarisha na kuwasilisha kwa Waziri mwenye dhamana ripoti ya mwaka kuhusiana na mwaka huo wa fedha ikijumuisha: Ripoti ya mwaka ya utekelezaji.

- (a) nakala ya hesabu zilizokaguliwa za Wakala, pamoja na ripoti ya mkaguzi kuhusiana na hesabu hizo;
- (b) ripoti ya utekelezaji wa kazi na taarifa nyengine zinazohusiana;
- (c) ripoti ya Wakala ya mwaka wa fedha uliokamilika; na
- (d) taarifa nyengine kama Waziri mwenye dhamana atakavyohitajia.

(2) Waziri mwenye dhamana atahakikisha kwamba nakala ya ripoti ya mwaka ya Wakala inawasilishwa mbele ya Baraza la Wawakilishi, ndani ya miezi miwili au katika kikao kinachofuata cha Baraza la Wawakilishi baada ya kupokea ripoti chini ya kifungu kidogo cha (1) cha kifungu hiki.

**32.** Wakala unaweza, baada ya kupata ruhusa ya Waziri mwenye dhamana ya fedha na kwa mujibu wa masharti ya Sheria ya Usimamizi wa Fedha za Umma, kufungua hesabu katika Benki yoyote kwa ajili ya kuweka fedha zake na kuendesha hesabu hiyo kwa ajili ya kutekeleza majukumu yake ipasavyo kwa mujibu wa Sheria. Ufunguaji wa Hesabu ya Benki.

**SEHEMU YA SITA  
MAKOSA NA ADHABU**

Makosa  
yanayohusi-  
ana na  
Wakala.

**33. Mtu ambaye:**

- (a) bila ya ruhusa ya kisheria, anafanya shughuli yoyote ya kiufundi, anazuia zana, anawasiliana na mtu yeyote asiyekuwa katika utekelezaji wa majukumu yake ya kikazi au anatoa taarifa alizozipata kutokana na ajira yake;
- (b) kutokana na nafasi yake ya ajira, anamiliki na kutumia taarifa yoyote inayohusiana na kazi za Wakala, zana au malighafi kwa maslahi yake binafsi;
- (c) anatoa taarifa za uongo au za kupotosha kuhusiana na kazi za Wakala;
- (d) anauza, anatumia au anaruhusu mashine za Wakala kutumika bila ya ruhusa ya Wakala;
- (e) anamruhusu mtu yeyote kutoka nje ya kiwanda kutumia muhuri, nembo, mashine na zana nyenginezo bila ya kupata idhini ya maandishi kutoka kwa Mkurugenzi Mtendaji;
- (f) anatumia, anasaidia au anaruhusu muhuri, nembo, mashine na zana nyengine za Wakala kutumika bila ya ridhaa ya Mkurugenzi Mtendaji; au
- (g) anakwenda kinyume au anashindwa kufuata sharti lolote la Sheria hii,

anatenda kosa na akitiwa hatiani atawajibika kulipa faini isiyopungua Shilingi za Kitanzania Milioni Tatu au kifungo kwa kipindi kisichopungua mwaka mmoja au vyote viwili faini na kifungo.

**SEHEMU YA SABA  
MASHARTI YA JUMLA**

Kinga.

**34.** Mjumbe wa Bodi, mfanyakazi au mtu yeyote aliyeajiriwa na Wakala hatowajibika yeye binafsi kwa jambo lolote au kitu alichokifanya au ameacha kukifanya kwa nia njema wakati wa utekelezaji wa kazi zake ndani ya mazigira ya kazi au utekelezaji wa jukumu lake chini ya Sheria hii.

Kuhaulisha  
mali.

**35.** Mali na madeni ambayo yapo kwa Wakala kabla ya Sheria hii, baada ya kuanza kutumika Sheria hii yatakuwa ya Wakala pamoja na riba, madeni, tozo, majukumu na dhamana zake zinazoathiri mali hizo.

**36.**-(1) Wakala unaweza baada ya kuombwa, kuwa na wajibu wa kutoa huduma zake kwa Wizara, Idara, Mamlaka, Mashirika na Taasisi nyengine za Serikali na Wizara, Idara, Mamlaka, Mashirika na Taasisi hizo nyengine za Serikali zitawajibika kuomba ushauri wa kiufundi kwa Wakala.

Wajibu wa  
Taasisi za  
Serikali.

(2) Kwa mujibu wa masharti ya kifungu kidogo cha (1) cha kifungu hiki na bila ya kujali masharti ya Sheria ya Ununuzi na Uondoshaji wa Mali za Umma, Taasisi za Serikali zitawajibika kufuata taratibu za manunuzi zinazoelekezwa.

**37.**-(1) Waziri anaweza, kwa kushauriana na Bodi, kutunga Kanuni kwa ajili ya utekelezaji bora wa masharti ya Sheria hii.

Kanuni.

(2) Bila ya kuathiri masharti ya jumla ya kifungu kidogo cha (1) cha kifungu hiki, Waziri anaweza, kwa madhumuni maalum kutunga Kanuni juu ya mambo yafuatayo:

- (a) kupata nyaraka na taarifa zilizowekwa na Wakala; na
- (b) uvunjwaji wa masharti yaliyowekwa chini ya kifungu cha 36.

**38.**-(1) Tangazo la Kisheria Nam. 55 la 2017 linafutwa.

Kufuta na  
kubakiza.

(2) Bila ya kujali ufutwaji chini ya kifungu kidogo cha (1) cha kifungu hiki, jambo lolote lililofanywa au lililotarajiwa kufanywa chini ya Tangazo la Kisheria lililofutwa, litachukuliwa kuwa limefanywa chini ya masharti ya Sheria hii.

## MADHUMUNI NA SABABU

Madhumuni ya Mswada huu ni kuanzisha mfumo wa kisheria wa Wakala wa Serikali wa Huduma za Matrekta na Zana za Kilimo, ambao utasimamia masuala yanayohusiana na huduma za matrekta na zana za kilimo kwa umma kwa madhumuni ya kuimarisha uwezo wa usimamizi na uendeshaji wa huduma kwa matumizi bora na maendeleo.

Mswada unaopendekezwa unakusudia kuanzisha Wakala wa Serikali wa Huduma za Matrekta na zana za kilimo ambao utakuwa na dhamana ya kusimamia viwango vya kuhuisha na kufanya matengenezo ya matrekta na zana za kilimo Zanzibar kwa ajili ya kuhakikisha huduma zinazotolewa na Wakala zitakidhi mahitaji ya mteja kwa kuzingatia huduma zilizo bora na zitakazotolewa kwa gharama zinazolingana.

Hivyo, Mswada umelenga kuipa uwezo Wakala juu ya uendeleu wa huduma za matrekta na zana za kilimo kwa uendeshaji makini na wa kitaalamu, utakaoendana na ukuaji endelevu na usimamizi imara kwa lengo la kuimarisha upatikanaji wa huduma za matrekta na zana za kilimo kwa usahihi, ufanisi na kwa wakati.

Mswada unapendekeza kuanzisha usimamizi imara ambao upo chini ya Mkurugenzi Mtendaji ambao atakuwa ni Ofisa Mtendaji Mkuu wa Wakala. Kwa madhumuni hayo Mkurugenzi Mtendaji atakuwa na dhamana ya kusimamia Wakala kwa ujuzi wa taaluma yake kwa namna ya kutoa huduma bora kwa wateja waliokusudiwa. Kwa kuongezea hayo, Mkurugenzi Mtendaji atawajibika kwa matrekta yote na zana za kilimo, pamoja na mfumo wa miundombinu ya Wakala unaojumuisha zana na nyenzo zilizopo chini ya Wakala.

Zaidi ya yote, Wakala utatekeleza kazi zake zilizoainishwa chini ya ushauri wa moja kwa moja wa Bodi ya Wakurugenzi itakayoongozwa na Mwenyekiti atakayeteuliwa na Rais na Maofisa wengine waandamizi kutoka taasisi husika za Serikali na binafsi watakaoteuliwa na Waziri mwenye dhamana ya masuala ya Wakala.

Mswada unaweka misingi ya Serikali kwa Wakala ambayo itasaidia kuhakikisha usimamizi bora kuhusiana na upangaji wa bajeti, ukusanyaji wa mapato, uwasilishaji wa taarifa za fedha kwa Waziri na mambomengine yanayohusiana na hayo kwa muijibu wa miamala ya kifedha inayokubalika kama inavyoainishwa na Sheria ya Fedha za Umma na Kanuni zake.

Mswada umegawika katika sehemu saba na kila sehemu imeelezea dhana inayojitegemea kwa ajili ya kuhakikisha msomaji ataweza kufahamu vizuri dhana iliyokusudiwa kwenye Mswada huu.

**Sehemu ya Kwanza** inaelezea masharti ya awali ambayo inajumuisha jina fupi na kuanza kutumika na ufafanuzi wa baadhi ya maneno yaliyotumika katika Mswada huu.

**Sehemu ya Pili** inahusiana na Uanzishwaji wa Wakala ambapo inajumuisha kuanzishwa kwa Wakala, uwezo na madhumuni ya Wakala, muhuri wa Wakala na kazi za Wakala.

***Sehemu ya Tatu*** inaweka masharti yanayohusiana na Usimamizi na Uongozi wa Wakala ambayo inajumuisha sehemu mbili ndogo; Bodi ya Wakurugenzi ambayo inajumuisha Muundo wa Bodi ya Wakurugenzi na Kazi na Majukumu ya Bodi ya Wakurugenzi.

***Sehemu ya Nne*** inahusiana na Mkurugenzi Mtendaji na Wafanyakazi wengine wa Wakala ambayo inajumuisha uteuzi wa Mkurugenzi Mtendaji, sifa za Mkurugenzi Mtendaji, majukumu ya Mkurugenzi Mtendaji, kuanzishwa kwa Idara na vitengo vya Wakala.

***Sehemu ya Tano*** inaelezea mambo yanayohusiana na masharti ya fedha ambayo inajumuisha fedha na rasilimali za Wakala, taratibu za utayarishaji wa bajeti, kutumika kwa Sheria ya Usimamizi wa Fedha za Umma, Uwezo wa kufungua Hesabu ya Benki ya Wakala na mambo mengine yanayohusiana na hayo.

***Sehemu ya Sita*** inahusiana na makosa na adhabu, sehemu hii inaweka makosa kwa wale wanaotenda makosa au mtu mwingine ambae anafanya au kujipatia jambo lolote ambalo ni kinyume na Sheria hii atakuwa mkosaji na atapewa adhabu au faini kuhusiana na kosa alilolifanya.

***Sehemu ya Saba*** inaelezea Masharti ya Jumla ambayo inajumuisha kinga ya wafanyakazi na wajumbe wa Bodi, kuhaulisha mali na madeni, wajibu wa Taasisi za Serikali kuomba huduma kutoka kwa Wakala, uhifadhi wa nyaraka, uwezo wa Waziri kutunga Kanuni na kufuta na kubakiza Tangazo la Kisheria Nam.55 la mwaka 2017.

**(RASHID ALI JUMA)**  
**WAZIRI WA KILIMO, MALIASILI, MIFUGO NA UVUVI,**  
**ZANZIBAR.**

